


李翰林集卷六



翰林供奉李白

記銘頌文

任城縣廳壁記

化城寺大鐘銘

并序

天門山銘

趙公西候亭頌

崇明寺佛頂尊勝陀羅尼幢頌

為竇氏小師祭璿和尚文

為宋中丞祭九江文

任城縣廳壁記

風姓之後國爲任城蓋秦之秦縣也一云秦之古縣也在禹貢則南徐之分當周成廼東魯之邦自伯禽到于順公三十二代遭楚蕩滅因屬楚焉炎漢之後更爲郡縣隋開皇三年廢高平郡移任城於舊居邑乃屢遷井則不改魯境七百里郡有十一縣任城其衝要東盤琅邪西控鉅野北走厥國南馳互鄉青帝太昊之遺墟白衣尚書之舊里土俗古遠風流清高賢良間生掩映天下地博厚川踈明漢則名王分茅魏則天人列

土所以代變豪侈家傳文章君子以才雄自高小人則鄙朴難治況其城池爽塏邑屋豐潤香閣倚日凌丹霄而欲飛石橋橫波驚彩虹而不去其雄麗坱圠有如此焉故萬商往來四海絲歷實泉貨之橐籥爲英髦之咽喉故資大賢以主東道製我美錦不易其人今鄉二十六戶一萬三千三百七十一帝擇明德以賀公宰之公溫恭克修儼碩有立季野備四時之氣士元非百里之才撥煩彌閑剖劇無滯鏘百發克破於楊葉刀一鼓必合於桑林寬猛相濟弦韋適中

一之歲肅而教之二之歲惠而安之三之歲富而樂之然後青衿向訓黃髮履禮耒耜就役農無游手之夫杼軸和鳴機罕嘯蛾之女物不知化陶然自春權豪鋤縱暴之心黠吏返淳和之性行者讓於道路任者併於輕重扶老攜幼尊尊親親千載百年再復魯道非神明博遠孰能契於此乎白探奇東蒙竊聽輿論輒記於壁垂之將來俾後賢之操刀知賀公之絕跡者也

化城寺大鐘銘

并序

噫天以震雷鼓羣動佛以鴻鐘驚大夢而能發

揮沉潛開覺茫蠢則鐘之取象其義博哉夫揚音大千所以清真心警俗慮協響廣樂所以達元氣彰天聲銘勲皇宮所以旌豐功昭茂德莫不配美金鼎增輝寶坊仍事作制豈徒然也粵有唐宣城郡當塗縣化城寺大鐘者量函千盈蓋邑宰李公之所初也公名有則系玄元之英藜茂列聖之天枝生于公族貴而秀出少蘊才略壯而有成西逾流沙立功絕域帝疇乎厥庸始學古從政歷宰潔白聲聞于天天書褒榮輝之簡牘稽首三復子孫其傳天寶之初鳴琴此

邦不言而治日計之無近功歲計之有大利物
不知化潛臻小康神明其道越不可尚方入于
禪關覩天宮崢嶸聞鐘聲瑣屑乃謂諸龍象曰
盍不建大法鼓樹之層臺使羣聾六時有所歸
仰不亦美乎於是發一言以先覺舉百里而感
應秋毫不挫人多子來銅崇朝而山積工不日
而雲會乃採鳧氏撰鳴鐘火天地之爐扇陰陽
之炭回祿奮怒飛廉震驚金精轉滑以融熠銅
液星縈而燿燦光噴日道氣敵天維紅雲點於
太清紫烟矗於遙海烜赫宇宙功侔鬼神瑩而

察之吁駭人也爾其龍質炳發虎形躩踞糜金
索以上組縣寶樓而迭擊傍振萬壑高聞九天
聲動山以隱隱響奔雷而闐闐救湯鑊於幽途
息劍輪於苦海景福貯壘被于人天非李公好
謀而成弘濟群有孰能與於此乎丞尉等並衣
冠之龜龍人物之標準大雅君子同僚盡心聞
善賈勇贊成厥美寺主昇朝開心古容英骨秀
氣洒落毫素謙柔笑言海受水而皆納鏡無形
而不燭直道妙用乃如是然常虛懷忘情潔已
利物是人行空寂不動見如來有若上座靈隱

都維邠則舒名僧日暉蘊虛常因調護賢哉六
關士普聞八萬法深入禪惠精修律義將博我
以文章求我以述作功德大海酌而難名遂與
六曹豪吏姑熟賢老乃緇乃黃鳧趨梵庭請揚
宰君之鴻美白昔忝侍從備于辭臣恭承德音
敢闕清風之頌其辭曰
雄雄鴻鐘砰隱天雷鼓霆擊警大千含號烜赫
聲無邊摧懼魑魅招靈仙傍極六道極九泉劍
輪輟苦期息肩湯鑊猛火停熾燃愷悌賢宰人
父母興功利物信可久德方金鐘永不朽

極

天門山銘

梁山博望關扃楚濱夾據洪流寔爲吳津兩坐
錯落如鯨張鱗惟海有若唯川有神牛渚怪物
目圍車輪光射島嶼氣凌星辰卷沙揚濤溺馬
殺人國秦呈瑞時訛返珍開則九江納錫閉則
五嶽飛塵天險之地無德匪親

趙公西候新亭頌

此頌在唐文中尚屬合作

惟十有四載皇帝以歲之驕陽秋五不稔乃愼
擇明牧恤南方凋枯伊四月孟夏自淮陰遷我
天水趙公作藩于宛陵祇明命也惟公代秉天

德晏
本安

憲作程南臺洪柯大本聿生懿德宜乎哉橫風
霜之秀氣鬱王霸之奇略初以鐵冠白筆佐我
燕京威雄振肅虜不敢視而後鳴琴二邦天下
取則起草三省朝端有聲天子識面宰衡動聽
殷南山之雷剖赤縣之劇強項不屈三州所居
大化咸列碑頌至於是邦也酌古以訓俗宣風
以布和平心理人兵鎮唯靜畫一千里時無莠
言退公之暇清眺原隰以此郡東塹巨海西襟
長江咽三吳扼五嶺輜軒錯出無旬時而息焉
出自西郭蒼然古道道寬列樹行無清陰至有

疾雷破山狂飈震壑炎景爍野秋霖灌途馬逼
側於谷口人周章於山頂亭候靡設逢迎闕如
自唐有天下作牧百數因循齷齪罔恢未圖及
公來思大葦前弊實相此土陟降觀之壯其迴
崗龍盤沓嶺波起勝勢交至可以有作方農之
隙廓如是營遂鏗崖堙卑驅石剪棘削污壤增
高隅以門以墉乃棟乃宇儉則不陋麗而不奢
森沉閑閑燥濕有庇若鳧之勇如鵬斯奮縈流
鏡轉涵映池底納遠海之餘清瀉蓮峰之積翠
信一方雄勝之郊五馬踟躕之地也長史齊公

光又人倫之師表司馬武公幼成衣冠之髦彥
錄事參軍吳鎮宣城令崔欽令德之後良材間
生縱風教之樂地出人倫之高格卓絕映古清
明在躬僉謀儻功不日而就惣是役也伊二公
之力歟過客沉吟以稱嘆邦人聚舞以相賀僉
曰我趙公之亭也群寮獻議請因謠頌以名之
則必與謝公北亭同不朽矣白以爲謝公德不
及後世亭不畱要衝無勿拜之言鮮登高之賦
方之今日我則過矣敢詢耆老而作頌曰
眈眈高亭趙公所營如鼇背突兀於太清如鵬

翼開張而欲行趙公之宇千載有覩必恭必敬
爰遊爰處瞻而思之罔敢大語趙公來翔有禮
有章煌煌鏘鏘如文翁之堂清風洋洋永世不
忘

崇明寺佛頂尊勝陀羅尼幢頌

并序

共工不觸山媧皇不補天其鴻波汨汨流伯禹
不治水萬人其魚乎禮樂大壞仲尼不作三道
其昏乎而有功包陰陽力掩造化首出衆聖卓
稱大雄彼三者之不足徵矣粵有我西方金仙
之垂範覺曠劫之大夢碎群愚之重昏寂然不

五鎮方牧聲聞于天帝乃加剖竹于魯魯道祭
然可觀方將和陰陽於太階致君於堯舜豈徒
閉閣坐嘯鴻盤二千哉乃再崇厥功發揮象教
於是與長史盧公司馬李公等咸明明在公綽
綽有裕韜大國之寶鐘元精之和榮兼半刺道
光列嶽才或大而用小識無微而不通政其有
經談豈更僕有律師道宗心摠群妙量苞大千
日何瑩而常明天不言而自運識听浪注玄機
清發每口演金偈古搖電光開關延敵罕有當
者由萬竅同號於一風衆流俱納於溟海若乃

嚴飾佛事規矩梵天法堂鬱以霧開香樓岌乎
島峙皆我公之締持也以天寶八華五月一日
示滅大寺百城號天四衆泣血焚香散花扶櫬
卧轍仙鶴數十飛鳴中絕非至德動天深仁感
物者其孰能與於此乎三綱等皆論窮彌天惠
湛清月傳千燈於智種了萬法於真空不謀同
心克樹聖跡太官李公乃命門於南垣廟通衢
曾盤舊規累構餘石壯士加勇力侔拔山纜擊
鼓以雷作拖鴻縻而電掣千人壯萬夫勢轉鹿
盧於橫梁浪環合而無際常六合之振動岬九

霄之崢嶸非鬼神功曷以臻此況其清景燭物
香風動塵群形所霑積苦都雪粲星辰而增輝
挂文字而不滅雖漢家金莖伏波銅柱擬茲陋
矣或日月圓滿方檀散華清心諷持諸佛稱贊
夫如是亦可以從一天至一天開天宮之門見
群聖之顏巍巍功德不可量也其錄事參軍六
曹英寮及十一縣官屬有宏才碩德含香繡衣
者皆列名碑陰此不具載郡人都水使者宣道
先生孫太冲得真人紫藥玉笈之書能令太一
神自成還丹以獻于帝帝服享萬壽與天同休

功成身退謝病而去不謂古之玄通微妙之士
歟乃謂白曰昔王文考觀藝於魯騁雄辭於靈
光陸佐公知名在吳銘雙闕於盤石吾子盍可
美盛德揚中和恭承話言敢不惟命遂作頌曰
揭高幢兮表天宮嶷獨出兮凌星虹神縱縱兮
來空佇扶傾乎蒼穹西方大聖稱大雄橫絕苦
海舟群蒙陀羅尼藏萬法宗善住天子獲厥功
明明李君牧東魯再新頽規扶衆苦如大雲王
注法雨邦人清涼喜聚舞揚鴻名兮振海浦銘
豐碑兮昭萬古

爲竇氏小師祭璿和尚文

年月日某謹以齋蔬之奠敢昭告于和尚之靈
伏惟和尚降靈自天依化遊世角立獨出巖然
生知鳳凰開九包之翼豫章橫萬頃之陂始傳
燈而納照因落髮以從師邁龍象以蹴踏爲天
人之羽儀紹釋風於西域迴佛日於東維若大
塊之噫氣鼓和風而一吹熱惱清灑道芽榮滋
走吳楚以宗仰將掃地而歸之嗚呼來無所從
去復何適水還火歸蕭散本宅寶舟輟棹禪月
掩魄痛一往而無蹤愴雙林之變白某早承訓
誨偏荷恩慈忝飡風於法侶旋落蔭於禪枝號
無輟響泣有餘悲手撰茗藥精誠嚴思翼神道
之昭格庶明靈而饗之

爲宋中丞祭九江文

謹以三牲之奠敬祭于長源公之靈惟神包括
乾坤平準天地劃三峽以中斷疏九道以爭奔
綱紀南維朝宗東海牲玉有禮祀典無虧今萬
乘蒙塵五陵慘贖蒼生悉爲白骨赤血流於紫
宮宇宙倒懸攙搶未滅含識結憤思剪元兇焉
兇參列雄藩各當重寄遵奉王命大舉天兵照海

色於旌旗肅軍威於原野而洪濤渤澥狂飈振
驚惟神使陽侯卷波羲和奉命樓船先濟士馬
無虞掃妖孽於幽燕斬鯨鯢於河洛惟神祐我
降休于民敬陳精誠庶垂歆饗

李翰林集卷第六

李翰林集卷第七

翰林供奉李白

讚歌

當塗李宰君畫讚

金陵名僧頽公粉圖慈親讚

李居士讚

安吉崔少府翰畫讚

宣城吳錄事畫讚

壁畫蒼鷹讚

師猛讚

羽林范將軍畫讚

金銀泥畫西方淨土變相讚

江寧楊利物畫讚

金鄉薛少府廳畫鶴讚

誌公畫讚

琴讚

朱虛侯讚

觀飲飛斬蛟圖讚

地藏菩薩讚

魯郡葉和尚讚

當塗李宰君畫讚

天垂元精。嶽降粹靈。應期命世。大賢乃生。吐奇獻策。敷聞王庭。帝用休之。揚光泰清。濫觴百里。涵量八溟。縉雲飛聲。當塗政成。雅頌一變。江山再榮。舉邑抃舞。式圖丹青。眉秀華蓋。目朗明星。鶴矯閭風。麟騰玉京。若揭日月。昭然運行。窮神闡化。永世作程。

金陵名僧顧公粉圖慈親讚

神妙不死。惜生此身。託體明淑。而稱厥親。粉爲造化。筆寫天真。貌古松雪。心空世塵。文伯之母。

可以為隣

李居士讚

至人之心如鏡中影揮斤萬變動不離靜彼質
我斤揮風是騁了物無二皆為匠郢吾族賢老
名喧寫真兒圖粉繪生為垢塵從白得衰與天
為隣默然不滅長存此身

安吉崔少府翰畫讚

齊表巨海吳嗟大風崔為令族出自太公克生
奇才骨秀神聰炳若秋月騫然雲鴻爰圖伊人
奪妙真宰卓立欲語謂行而在清晨一觀爽氣

十倍張之座隅仰止光彩

宣城吳錄事畫讚

大名之家昭彰日月生此髦士風霜秀骨圖真
像賢傳容寫髮束帶嶽立如朝天闕巖巖兮謂
四方之削成澹澹兮申五湖之澄明武庫肅穆
辭峰崢嶸大辯若訥太音希聲默然不語終為
國楨

壁畫蒼鷹讚譏主人

突兀枯樹傍無寸枝上有蒼鷹獨立若秋胡之
攢眉凝金天之殺氣凜粉壁之雄姿背銛劍戟

爪握刀錐群賓失席以睥眦未悟丹青之所爲
吾嘗恐出戶牖以飛去何意終年而在斯

方城張少公
師猛讚

張公之堂華壁照雪師猛在圖雄姿奮發森竦
眉目颯灑毛骨鋸牙銜霜鈎爪抱月掣躡胡
云製以震怒謂有厦一作夏之堯杌永觀厥容神
駭不歇舊本無永觀厥容神駭不歇二句

羽林范將軍畫讚

羽林列衛壁壘南垣四十五星光輝至尊范公
拜將遙承主恩位寵虎臣封傳鴈門瞻天蹈舞

踴躍精魂逐逐鸚視昂昂鴻騫心豪祖述氣爽
劉琨名震大國威揚列藩麟閣之階粉圖華軒
胡兵百萬橫行縱吞爪牙帝室功業長存

金銀泥畫西方淨土變相讚并序

我聞金天之西日沒之所去中華十萬億刹有
極樂世界焉彼國之佛身長六十萬億恒沙由
旬眉間白毫向右宛轉如五須彌山目光清白
若四海水端坐說法湛然常存沼明金沙岸列
珍樹欄楯彌覆羅網周張車渠瑠璃爲樓殿之
飾頰黎碼碯耀階砌之榮皆諸佛所證無虛言

者金銀泥畫西方淨土變相蓋馮翊郡秦夫人
奉爲亡夫湖州刺史韋公之所建也夫人蘊米
玉之清敷聖善之訓以伉儷大義希拯拔幽塗
父子恩深用重修於景福誓捨珍物購求名工
圖金創端繪銀設像八法功德波動青蓮之池
七寶香花光映黃金之地清風所拂如生五音
百千妙樂咸疑動作若已發願未及發願若已
當生未及當生精念七日必生其國功德罔極
酌而難名讚曰

向西日沒處遙瞻大悲顏月淨四海水身光紫

金山勤念必往生是故稱極樂珠網珍寶樹天
花散香閣圖畫了在眼願託彼道場以此功德
海冥祐爲舟梁八十一劫罪如風掃輕霜庶觀
無量壽長願玉毫光

江寧楊利物畫讚

太華高嶽三峰倚天洪波經海百代生賢爲夔
爲龍廓土濟川趙城開國玉樹凌烟筆鼓元化
形分自然明珠獨轉秋月孤懸作宰作程摧剛
控堅德合窈冥聲播蘭荃鴻漸麟閣英圖可傳

金鄉薛少府廳畫鶴讚

高堂閑軒軒一作明兮雖聽訟而不擾圖蓬山之
奇禽想瀛海之縹緲紫頂烟旄丹眸星皎昂昂
佇眈一作欲飛霍若驚矯形留座隅勢出天表謂長
鳴一作於風霄終寂立於露曉凝翫益古俯察
逾妍舞疑傾市聽似聞絃儻感至精以神變可
弄影而浮烟

誌公畫讚

水中之月了不可取虛空其心寥廓無主錦幪
鳥爪獨行絕侶刀齊尺梁扇迷陳語丹青聖容
何往何所一作往何所

琴讚

嶧陽孤桐石聳天骨根老冰泉葉苦霜月斷爲
綠綺微聲粲發秋風入松萬古奇絕

朱虛侯讚

嬴氏穢德金精摧傷秦鹿克獲漢風飛揚赤龍
登天白日昇光陰虹賊虐諸呂擾攘朱虛來歸
會酌高堂雄劔奮擊太后震惶爰鋤產祿大運
乃昌功冠帝室于今不亡

觀飲飛斬蛟龍圖讚

飲飛斬長蛟遺圖畫中見登舟旣虎嘯激水方

龍戰驚波動連山拔劍曳雷電鱗摧白刃下血
染滄江變感此壯古人千秋若對面

地藏菩薩讚并序

大雄掩照日月崩落惟佛智慧大而光生死雪
賴假普慈力能救無邊苦獨出曠劫導開橫流
則地藏菩薩爲當仁矣弟子扶風竇滔少以英
氣爽邁結交王侯清風豪俠極樂生疾乃得惠
劍於眞宰湛本心於虛空願圖聖容以祈景福
庶冥力憑助而厥苦有瘳爰命小木式讚其事
讚曰

本心若虛空清淨無一物焚蕩淫怒癡圓寂了
見佛五綵圖聖像悟眞非妄傳掃雪萬病盡爽
然清涼天讚此功德海永爲曠代宣

魯郡葉和尚讚

海英嶽靈誕彼開士了身皆空觀月在水如薪
傳火卽徹生死如雲開天廓然萬里寂滅爲樂
江海而閑逆旅形內虛舟世間邈彼岷閬誰云
可攀

李翰林集卷第八

翰林供奉李白

序上

暮春於江夏送張祖監丞之東都序

奉餞十七翁二十四翁尋桃花源序

夏日奉陪司馬武公與群賢宴姑熟亭序

江夏送林公上人遊衡嶽序

金陵與諸賢送權十一序

春於姑熟亭送趙少府遷炎方序

春於南浦與諸公送陳郎將歸衡陽序

秋於敬亭送從姪崑遊廬山序

汎沔州城南郎官湖詩序

暮春江夏送張祖監丞之東都序

吁咄哉僕書室坐愁亦已久矣每思欲遐登蓬萊極目四海手弄白日頂摩青穹揮斥幽憤不可得也而金骨未變玉顏已緇何常不捫松傷心撫鶴歎息誤學書劍薄遊人間紫微九重碧山萬里有才無命甘於後時劉表不用於禰衡暫來江夏賀循喜逢於張翰且樂船中達人張侯大雅君子統泛舟之役在清川之湄談玄賦

詩連興數月醉盡花柳賞窮江山困命有程告以行邁烟景晚色慘爲愁容繫飛帆於半天泛淶水於遙海欲去不忍更開芳樽樂雖案中趣逸天半平生酣暢未若此筵至於清談皓歌雄筆麗藻笑飲醪酒醉揮素琴余實不愧於古人也揚袂遠別何時歸來想洛陽之秋風將鱸魚以相待詩可贈遠無乃闕乎

奉餞十七翁二十四翁尋桃花源序

寺沮龍滅古道嚴威刑煎熬生人若墜大火三堦五典散爲寒灰築長城建阿房并諸侯殺豪

俊自謂功高義皇國可萬世思欲凌雲氣求仙人登封太山風雨暴作雖五松受職草木有知而萬象垂度禮刑將施則綺皓不得不遁於南山魯連不得不蹈於東海則桃源之避世者可謂超昇先覺夫指鹿之儔連頸而同死非吾黨之謂乎二翁耽老氏之言繼少卿之作文以述大雅道以通至精卷舒天地之心脫落神仙之境武陵遺跡可得而窺焉問津利往水引漁者苑藏仙谿春風不知從來落英何許流出石洞來入晨光盡開有良田名池竹果森列三十六

洞別爲一天耶今扁舟而行然笑謝人世阡陌未改古人依然白雲何時而歸來青山一去而誰往諸公賦桃源以美之

夏日奉陪司馬武公與群賢宴姑熟亭

序

通驛公館南有水亭焉四薨疊飛巉絕浦嶼蓋有前攝令河東薛公棟而宇之今宰隴西李公明化開物成務又橫其梁而閣之晝鳴閑琴夕酌清月蓋爲接輶軒祖遠客之佳境也製置旣久莫知何名司馬武公長材博古獨映方外因

行
世字疑

據胡牀岍憤嘯詠而謂前長史李公及諸公曰
此亭跨姑熟之水可稱爲姑熟亭焉嘉名勝槩
自我作也且夫曹官紱冕者大賢處之若遊青
山卧白雲逍遙偃傲何適不可小才居之窘而
自拘悄若桎梏則清風朗月河英嶽秀皆爲棄
物安得稱焉所以司馬南隣當文章之旗鼓翰
林客卿揮辭鋒以戰勝名教樂地無非得俊之
場也千載一時言詩紀志

江夏送林公上人遊衡嶽序

江南之仙山黃鶴之爽氣偶得英粹後生俊人

林公世爲豪家此土之秀落髮歸道專精律儀
白月在天朗然獨出旣灑落於彩翰亦諷誦於
人口閑雲無心與化偕往欲將振五樓之金策
浮三湘之碧波乘杯泝流考室名嶽瞰憩冥壑
凌臨諸天登祝融之峰巒望長沙之烟火遙謝
舊國誓遺歸蹤百千開士稀有此者余所以歎
其峻節揚其清波龍象先輩迴眸拭視比夫汨
泥沙者相去如牛之一毛昔智者安禪於台山
遠公托志於廬嶽高標勝槩斯亦嚮慕哉紫霞
搖心青楓夾岍目斷川上送君此行群公臨流

賦詩以贈

金陵與諸賢送權十一序

斯高柄秦嬴世不二三傑伏草與漢並出莽夷
朱暉耿鄧乃起自古英達未必盡用於當年去
就之理在大運爾我君六葉繼聖熙乎玄風三
清垂拱穆然紫極天人其一哉所以青雲豪士
散在商鈞四坐明哲皆清朝旅人吾希風廣成
蕩漾浮世素受寶訣爲三十六帝之外臣即四
明逸老賀知章呼余爲謫仙人蓋寶錄耳而嘗
採姹女於江華收河車於清溪與天水權昭夷

服勤爐火之業久矣之子也冲恬淵靜翰才峻
發白每一篇一札皆昭夷之所操吁捨我而南
若折羽翼時歲律寒苦天風枯聲雲帆涉漢罔
若絕雷舉目四顧霜天崢嶸銜杯叙離群子賦
詩以出餞酒仙翁李白辭

春於姑熟送趙四流炎方序

白以鄒魯多鴻儒燕趙饒壯士蓋風土之然乎
趙少翁才貌瓌雅志氣豪烈以黃綬作尉泥蟠
當塗亦雞棲鶴籠不足以窘束鸞鳳一作耳以
疾惡抵法遷于炎方辭高堂而墜心指絕國以

搖恨天與水遠雲連山長借光影於頃刻開壺
觴於洲渚黃鶴曉別愁聞命子之聲青楓暝色
盡是傷心之樹然自吳瞻秦日見喜氣上當攬
玉弩摧狼狐洗清天地雷雨必作翼白日廻照
丹心可明巴陵半道坐見還吳之棹令雪解而
松栢振色氣和而蘭蕙開芳僕西登天門望子
於西江之上吾賢可流水其道浮雲其身通方
大適何往不可何戚戚於路歧哉

春於南浦與諸公送陳郎將歸衡嶽序
仲尼旅人文王明夷苟非其時聖賢低眉況僕

之不肖者而遷逐枯槁固誠其宜朝心不開暮
髮盡白而登高送遠使人增愁陳郎將義風凜
然英思逸發來下曹城之榻去邀才子之詩動
清興於中流泛素波而徑去諸公仰望不及連
章祖之以序屬予輒冠名賢之首作者嗤我乃
爲撫掌之資乎

秋於敬亭送從姪端遊廬山序

余小時大人令誦子虛賦私心慕之及長南遊
雲夢覽七澤之壯觀酒隱安陸蹉跎十年初嘉
興季父謫長沙西還時途拜見預飲林下端乃

稚子嬉遊在傍今來有成鬱負秀氣吾衰久矣
見爾慰心申悲導舊破涕爲笑方告我遠涉西
登香爐長山橫感九江却轉瀑布天落半與銀
河爭流騰虹奔電潑射萬壑此宇宙之奇詭也
其上有方湖石井不可得而窺焉羨君此行撫
鶴長嘯恨丹液未就白龍來遲使秦人著鞭先
往桃花之水孤負夙願慙歸名山終期後來攜
手五嶽情以送遠詩寧闕乎

泛沔州城南郎官湖詩并序

乾元歲秋八月白遷於夜郎遇故人尚書郎張

昌黎
沔州

謂出使夏口沔州牧杜公漢陽宰王公觴于江
城之南湖樂天下之再平也方夜永月如練清
光可掇張公殊有勝槩四望超然乃顧白曰此
湖古來賢豪遊者非一而枉踐佳境寂寥無聞
夫子可謂我標之嘉名以傳不朽白因舉酒醉
水号之曰郎官湖亦由鄭圃之有僕射陂也席
上文士輔翼岑靜以爲知言乃命賦詩紀事刻
石湖側將與大別山其相磨滅焉

張公多逸興共泛沔城隅當時秋月好不減
昌都四坐醉清光爲歡古來無郎官愛此水四

李翰林集卷第八
号郎官湖風流若未減名與此山俱

李翰林集卷第八

李翰林集卷第九

翰林供奉李白

序中

荅族姪僧中孚贈玉泉仙人掌茶序

贈嵩山焦鍊師詩序

送黃鐘之鄱陽謁張使君序

早春於江夏送蔡十還家雲夢序

秋日太原南柵餞陽曲王贊賈少公石艾

尹公應舉赴上都序

送戴十五歸衡嶽序

早夏於將軍叔宅與諸昆季送傅八之江
南序

冬日於龍門送從弟京兆參軍令問之淮
南觀省序

荅族姪僧中孚贈玉泉仙人掌茶序

余遊荊州玉泉寺近清溪諸山山洞往往有乳
窟窟中多玉泉交流中有百蝙蝠大如鷓按仙
經蝙蝠一名仙鼠千歲之後體白如雪棲則倒
懸蓋飲乳水而長生也其水邊處處有茗草羅
生枝葉如碧玉唯玉泉真公常采而飲之年八

十餘歲顏色如桃花而此茗清香滑熟異於他
者所以能還童振枯壯人壽也余遊金陵見宗
僧中孚示余茶數十片拳然重疊其狀如手號
爲仙人掌蓋新出乎玉泉之山曠古未覲因持
之見遺兼贈詩要予荅之遂有此作後之高僧
大隱知仙人掌茶發乎中孚禪子及青蓮居士
李白也

贈嵩山焦鍊師詩序

嵩山有神人焦鍊師者不知何許婦人也又云
生於齊梁時其年號可稱五六十常胎息絕穀

居少室廬遊行若飛倏忽萬里世或傳其入東
海登蓬萊竟不能測其往也余訪道少室盡登
三十六峰聞風有寄灑翰遙贈

送黃鐘之鄱陽謁張使君序

東南之美者有江夏黃公焉白切飲風流始接
談笑亦有抗節玉立光輝炯然氣高時英辯折
天口道可濟物志棲無垠鄱陽張公朝野榮望
愛客接士即原常春陵之亞焉每欽其辭華懸
榻見往而黃公因訪古跡便從貴遊乃僑裝撰
行去國遐陟諸子銜酒惜別沾巾贈分沈醉烟

夕惆悵涼月天南迴以變夏火西飛而獻秋汀
葭颯然海草微落夫子行邁我心若何毋金玉
爾音而有遐心湖水瀟沔助哉是行共賦武昌
釣臺篇以慰別情耳

早春於江夏送蔡十還家雲夢序

吾觀蔡侯奇人也爾其才高氣遠有四方之志
不然何周流宇宙太多耶白遐窮冥搜亦以早
矣海草三綠不歸國門又更逢春再結鄉思一
見夫子冥心道存窮朝晚以作宴驅烟霞以輔
賞朗笑明月時眠落花斯遊無何尋告睽索來

暫觀我去還愁人乃浮漢陽入雲夢鄉世云叩
歸魂亦飛且青山綠楓累道相接過勝因賞利
君前行既非遠離曷足多歎秋七月結遊鏡湖
無憊我期先子而往敬慎好去終當早來無使
瓊耶白雲不得復弄爾鄉中廖公及諸才子為
詩略謝之

秋日於太原南柵餞陽曲王替公賈少
公石艾尹少公應舉赴上都序

天王三京北都居一其風俗遠蓋陶唐氏之人
歟襟四塞之要衝控五原之都邑雄藩劇鎮非

賢莫居則陽曲丞王公神仙之曹也爾其學鏡
千古知周萬殊又若少府賈公以述作之雄也
鰲弄筆海虎攫辭場又若石艾尹少公廊廟之
器口折黃馬手揮青萍咸道貫於人倫名飛於
日下實難沉屈永懷青霄劍有隱而氣衝七星
珠雖潛而光照萬壑今年春皇帝有事于畝湛
恩八埏大搜群才以緝邦政而王公以令宰見
舉賈公以王霸昇聞海激佇乎三千天飛期於
六月必有以也豈徒然哉有從兄太原主簿舒
才華動時規謀匠物乃點翠幕筵虹梁瓊蓋霞

開羽觴電舉然後抗目遠覽憑軒高吟屏谷事
於煩襟結浮歡於落景俄而皓月生海來窺醉
容黃雲出關半起秋色數君乃輟酌慷慨搖心
促裝望丹闕而非遠揮玉鞭而且去白也不敏
先鳴翰林幸叨玳瑁之筵敢竭麒麟之筆請各
探韻賦詩寵行

送戴十五歸衡嶽序

白上探玄古中觀人世下察交道海內豪俊相
識如浮雲自謂德參夷顏才亞孔墨莫不名由
口進實從事退而風義可合者厥惟戴侯戴侯

寓居長沙稟湖嶽之氣少長咸洛窺霸王之圖
精微可以入神懿重可以崇德謨猷可以尊主
文藻可以成化兼以五材統以四美何往而不
濟也其二三諸昆皆以才秀擢用辭翰炳發昇
聞天朝而此君獨潛光後世以期大用鯤海未
躍鵬霄悠然不遠千里訪余以道邛國之秀有
廖侯焉人倫精鑒天下獨立每延以宴讌許爲
通人獨孤有隣及薛諸公咸亦以爲信然矣屬
明主未夢且歸衡陽憩祝融之雲峯弄茱萸之
湍水軒騎糾合祖於魏公之林亭笙歌鳴秋劍

舞增氣况江葉墜綠沙鴻冥飛登高送遠使人
心醉見周張二子爲論平生雞黍之期當速赴
也

早夏於江將軍叔宅與諸昆季送傳八
之江南序

易曰觀乎人文以化成天下窮此道者其惟傳
侯耶侯篇章驚新海內稱善五言之作妙絕當
時陶公愧田園之能謝客慙出水之美佳句籍
籍人爲美談前許州司馬宋公蘊冰清之姿重
傳侯玉潤之德妻以其子鳳凰于飛潘楊之好

斯爲睦矣僕不佞也忝于芳塵宴同一筵心契
千古清酌連曉立談入微歡攜無何旋告睽折
將軍叔英略蓋古英明洞神天王貴宗誕育賢
子八龍增秀以列次五色相輝而有文會言高
樂曉餞金門洗德絃觴怡顏朱明草木已盛且
江嶂若畫賞盈前途自然屏間坐遊鏡裏行到
霞月千里足供文章之用哉征帆空懸落日相
迫二季揮翰詩其贈焉

冬日於龍門送從弟京兆參軍令問之
淮南觀省序

二行中疑多脫

江下疑有二字

紫雲仙季有英風焉吾家見之若衆星之有月
貴則天王之令策寶則海嶽之奇精遊者所謂
風生玉林清明蕭灑真不虛也常醉目吾曰兄
心肝五臟皆錦繡耶不然何開口成文揮翰霧
散吾因撫掌大笑揚眉當之使王澄再聞亦復
絕倒觀夫筆走群象思通神明龍章炳然可得
而見歲十二月拜省于淮南思白華之長吟眺
黃雲之晚色目斷心盡情懸高堂傾蘭醕而送
行赫金鞍而照地錯轂躡野朝英滿筵非才名
動時何以及此日落酒罷前山陰烟殷勤惠言

東下疑有脫誤
吾道東坐想洛橋春色先到淮城見千條之綠
楊折一枝以相贈則華萼情在吾無恨焉群公
賦詩以光榮餞

李翰林集卷第十

翰林供奉李白

序下

江夏送倩公歸漢東序

餞李副使藏用移軍廣陵序

澤畔吟序

夏日諸從弟登汝州龍興閣序

秋日於安府送孟贊府允還都序

春夜宴從弟桃花園序

冬夜於隨州紫陽先生飡霞樓上送烟子

元演隱仙城山序

江夏送倩公歸漢東序

謝安四十卧白雲於東山栢公累徵為蒼生而
一起常與支公遊賞貴而不移大人君子神冥
契合正可乃爾僕與倩公面不忝古人言歸漢
東使我心痲夫漢東之國聖人所出神農之後
季良為大賢爾來寂寂無一物可紀有唐中興
始生紫陽先生先生六十而隱化若繼跡而起
者惟倩公焉蓄壯志而未就期老成於他日且
能傾產重諾好賢攻文即惠休上人與江鮑往

身在此
第廿四
七卷

復各一時也僕平生述作罄其草而授之思親
遂行流涕惜別今聖朝已捨季布當徵賈生開
顏洗目一見白日翼相視而笑於新松之山耶
作小詩絕句以寫別意李白辭曰一本無彼美
一作漢東國川藏明月輝寧知喪亂後更有一
珠歸

餞李副使藏用移軍廣陵序

夫功未足以蓋世威不可以震主必挾此者持
之安歸所以彭越醢於前韓信誅於後况權位
不及於此者虛主危疑而潛苞禍心小拒王命

是以謀臣將啖以節鉞誘而烹之亦由借鴻濤
於奔鯨鱣生人於哮虎呼吸江海橫流百川左
縈右拂十有餘郡國計未及誰當其鋒我副使
李公勇冠三軍衆無一旅橫倚天之劍揮駐日
之戈吟嘯四顧熊羆雨集蒙輪扛鼎之士杖干
將而星羅上可以決天雲下可以絕地維翕振
虎旅赫張王師退如山立進若電逝轉戰百勝
殭屍盈川水膏於滄溟陸血於原野一掃瓦解
洗清全吳可謂萬里長城橫斷楚塞不然五嶺
之北盡餌於修蛇勢盤地蹙不可圖也而功大

用小天高路遐社稷雖定於劉章封侯未施於
李廣使慷慨之士長吁青雲且移軍廣陵恭揖
後命組練照雪樓船乘風簫鼓沸而三山動旌
旗揚而九天轉良牧出祖烈將登筵歌酣易水
之風氣振武安之瓦海日夜色雲帆中流席闌
賦詩以壯三軍之事白也筆已老矣序何能爲

澤畔吟詩

澤畔吟者遂臣崔公之所作也公代業文宗早
茂才秀起家校書蓬山再尉關輔中佐于憲車
因貶湘陰從宦二十有八載而官未登於郎署

何遇時而不偶耶所謂大名難居碩果不食流
離乎沅湘摧頓於草莽同時得罪者數十人或
才長命夭覆巢蕩室崔公忠憤義烈形于清辭
慟哭澤畔哀形翰墨猶風雅之什聞之者無罪
覩之者作鏡書所感遇物二十章名之曰澤畔
吟懼奸臣之猜常韜之於竹簡酷吏將至則藏
之於名山前後數四蠹傷卷軸觀其逸氣頓挫
英風激揚橫波遺流騰薄萬古至於微而彰婉
而麗悲不自我興成他人豈不云怨者之流乎
余覽之愴然掩卷揮涕爲之序云

禮深

夏日諸從弟登汝州龍興閣序

夫槿榮芳園蟬嘯珍木蓋紀乎南火之月也可
以處臺榭居高明吾之友于順此意也遂卜精
勝得乎龍興留寶馬於門外步金梯於閣上漸
出軒戶遐瞻雲天晴山翠遠而四合暮江碧流
而一色屈指鄉路還疑夢中開襟危欄宛若空
外嗚呼屈宋長逝無堪與言起予者誰得我二
季當揮爾鳳藻搜乎需觴與白雲老兄俱莫負
古人也

秋夜於安府

夫子孟贊府兄還都序

夫士有飾危冠佩長劍揚眉吐諾激昂青雲者
咸誇炫意氣託交王侯若告之急難乃十失八
九我義兄孟子則不然耶道合而襟期暗親志
乖而肝膽楚越鴻騫鳳立不循常流孔明披書
每觀於大略少君讀易時作於小文四方賢豪
眩然景慕雖長不過七尺而心雄萬夫至於酒
情中酣天機俊發則談笑滿席風雲動天非嵩
丘騰精何以及此白以弱植早飲香名况親承
光輝恩甚華萼他鄉此別誰無恨耶時林風吹
霜散下秋草海鴈嘶月孤飛朔雲驚魂動骨夏

路
瑟落涕抗手緬邁傷如之何且各賦詩以寵岐

春夜宴從弟桃花園序

夫天地者萬物之逆旅也一本云天地者萬物者光
陰者百代之過客也而浮生若夢爲歡幾何古
人秉燭夜遊良有以也況陽春召我以烟景大
塊假我以文章會桃花之芳園序天倫之樂事
群季俊秀皆爲惠連吾人詠歌獨慙康樂幽賞
未已高談轉清開瓊筵以坐花飛羽觴而醉月
不有佳詠何伸雅懷詩不成罰依金谷酒斗

數

冬夜於隨州紫陽先生飡霞樓送烟子

元演隱仙城山序

吾與霞子元丹烟子元演氣激道合結神仙交
殊身同心誓老雲海不可奪也歷行天下周求
名山入神農之故鄉得胡公之精術胡公身揭
日月心飛蓬萊起飡霞之孤樓鍊吸景之精氣
延我數子高談混元金書玉訣盡在此矣白乃
語及形勝紫陽因大誇仙城元侯聞之乘興將
往別酒寒酌醉青田而少留夢魂曉飛度淥水

以先去吾不凝滯於物與時推移出則以平交
王侯遁則以俯視巢許朱紱狎我綠蘿未歸恨
不得同棲烟林對坐松月有所款然銘契潭石
乘春當來且抱琴卧花高枕相待詩以寵別賦
而贈之

唐憲成成春日以高痛不能入直案上有晏知止所列李集重

開本以其第二十五至三十一卷所載太白文對校一過晏本經

曾子固編次以此微有不同文義亦互有短長因就余所能

李翰林集卷第十

知二句是正太白文見於英華尚存樂史亦當補刊於後也

太白文集十卷 宋樂史所編即所謂李翰林別集者也中既因李陽冰草堂集校勘補戢定為詩二十卷復於三館中得賦序表讚書頌諸篇定為別集於是太白之文盡於是矣夫文章至李杜為一代之極雖韓子亦有光焰萬丈之稱顧可泯其傳乎予家故有淳熙間刻本今歸之元大元大因重刻之家塾云正德己卯鄉進士吳郡

袁翼記



